

Forskrift om skulefritidsordninga (SFO) i Samnanger kommune

Heimel: Fastsett av kommunestyret 19.06.2025 med heimel i lov 9. juni 2023 nr. 30 om grunnskoleopplæringa og den vidaregåande opplæringa (opplæringslova) § 4-5 femte ledd.

§ 1. Eigartilhøve

Samnanger kommune eig og driftar skulefritidsordninga.

§ 2. Opptaksmyndigheit

Einingsleiar ved Samnanger barneskule er delegert ansvar for opptak til skulefritidsordninga.

§ 3. Opptakskriterium

Opptak skjer etter søknad med søknadsfrist til hovudopptak 1. mars med oppstart i august.

Elevar på 1. – 4. trinn og elevar med særskilte behov på 5. – 7. trinn kan tildelast plass på skulefritidsordninga.

§ 4. Opptaksperiode, oppseiing og endring av SFO-plass

Opptaksperiode gjeld frå tildelt SFO-plass og varar til og med 4. trinn, eller til avtalen vert sagt opp av føresette.

Tildelt SFO-plass for barn med ekstra behov frå 5. - 7. trinn varar til og med 7. trinn, eller til avtalen vert sagt opp av føresette.

Søknad om plass i SFO skjer digitalt med skjema som ein finn lenke til på Samnanger kommune si heimeside: [Skulefritidsordning \(SFO\) - Samnanger kommune](#)

Det kan søkjast om SFO-plass gjennom skuleåret og det vert tildelt plass i løpet av skuleåret ved ledig kapasitet. Me tilbyr kjøp av ekstradagar etter søknad frå føresette. Dette tilbodet gjeld alle elevar i 1. - 4. klasse uavhengig av om ein har plass i SFO eller ikkje.

Oppseiing og endring av plasstype skal gjerast i Visma føresettportalen Samnanger kommune - Skulefritidsordning (SFO). Oppseiingsfristen er ein månad og vert rekna frå den 1. i månaden etter at oppseiinga er motteken. Dersom ein ikkje skal ha plassen skuleåret etter, må dette meldast skriftleg og innan 1. april. Sluttar barnet etter 1. april betalar ein for plassen ut juni månad. Oppseiingsfrist gjeld òg når føresette reduserer opphaldstida.

Betalingsfrist er den 20. i kvar månad.

§ 5. Foreldrebetaling

Kommunestyret fastset satsar for opphald i SFO. Satsane vert gjort gjeldande frå 1. januar kvart år, og går fram av betalingsreglement for kommunen. Innbetalinga skal skje forskotsvis.

- Søskenmoderasjon: 30 % for 1. søsken og 50 % for 2. søsken.
- 12 timar gratis kjernetid pr veke, for 1. - 3. trinn. Gjeld òg feriar.
- Gratis for barn med særskilde behov på 5. - 7. trinn. Gjeld òg feriar.

Forskrift om skulefritidsordninga (SFO)

- Søknad om redusert foreldrebetaling etter forskrift til opplæringslova.

Kombinasjon av ulike tilbod skal ikkje overskride kjøp av heiltidstilbod. Unntak er kjøp av feriedagar.

Permisjon og betalingsfritak

Ein kan i særskilde høve søkja om permisjon og få betalingsfritak frå SFO. Dette gjeld til dømes ved samanhengande sjukdom hos barnet ut over 14 dagar og liknande. Permisjonen vert avgrensa til skuleåret. Rektor kan gje permisjon og betalingsfritak.

§ 6. Leike- og opphaldsareal

SFO disponerar ute- og inneareal ved skulen, som er eigna til føremålet. Arealet skal vera godkjende etter [Forskrift - Helse og miljø i barnehager, skoler og skulefritidsordningar](#)

§ 7. Dagleg opphaldstid og årleg opningstid

Det ordinære SFO-tilbodet følgjer skuleruta, det vil seie 190 skuledagar med betaling over 10 månader. Ein betaler for heile juni medan juli og august er betalingsfrie månader.

Dagleg opningstid er frå kl. 07.00 til skulestart om morgonen, og frå skuleslutt til kl. 16.30 om ettermiddagen.

SFO-tilbodet har fylgjande alternativ:

Morgon frå kl. 07.00 til kl. 08.30. Ettermiddag frå kl. 14.00 til kl. 16.30

Grunna kortare skuledag om onsdagen er SFO si opningstid kl. 12.30 – kl. 16.30.

- a) 100 % plass (21,5 time)
- b) 65% plass (5 ettermiddagar)
- c) 63 % kombinasjonsplass (3 dagar morgon/ettermiddag)
- d) 42 % plass (3 ettermiddagar)
- e) 34 % plass (alle morgonar)
- f) Kjøp av einskilde morgonar/ettermiddagar
- g) Kjøp av einskilde dagar i feriar

Samnanger kommune gjev tilbod om SFO i seks ferieveker; i vinterferien, tre veker etter skuleslutt i juni, ei veke før skulestart i august og i haustferien. Påmeldinga er bindande og det blir kravd ekstra betaling for elevar som nyttar ferieope SFO.

Endring av påmelding må vere skriftleg og skal registrerast seinast 14 dagar før ferieope SFO om ein vil unngå krav om betaling.

§ 8. Personal og leiing

Rektor ved Samnanger barneskule er administrativ leiar for SFO og har ansvar for at SFO er ein del av heilskapen på skulen. Opplæringslova og tilhøyrande forskrift fastset ikkje noko fast tal for tilhøvet mellom barn og vaksne. Samnanger kommune har 8 barn per vaksen nr. 1, og deretter 15 barn per vaksen nr 2, 3 og så vidare.

Forskrift om skulefritidsordninga (SFO)

Det skal gjerast ei skjønnsvurdering ved tildeling av ressursar ut frå alder, gruppestorleik og barn med særskilde behov. Skulen si rutine for SFO syner korleis tryggleiken til barn og tilsette vert ivareteken dersom den tilsette er åleine på jobb.

§ 9. Ikraftsetjing

Forskrifta trer i kraft 19.06.2025.

Vedtekter for skulefritidsordninga i Samnanger kommune, vedteke i kommunestyret 22.02.2024, er oppheva.